

23.11.2023.



UNIS „Ginex“ d.d. najuspješnija kompanija u Bosansko-podrinjskom kantonu po ostvarenoj dobiti u 2022.godini

Udruženje poslodavaca BPK Goražde i ove godine bilo je organizator manifestacije "Večer uspješnih poslovnih priča", kojom želi da oda priznanje privrednim subjektima koji su ostvarili najveću dobit u 2022. godini u kategoriji velikih, srednjih, malih i mikro preduzeća.

U kategoriji velikih preduzeća nagradu je dobila firma UNIS Ginex d.d. Goražde, kompanija koja je izvozno orijentisana i više od 85% proizvodnje Ginex-a namijenjeno je izvozu. Priznanje je uručio premijer BPK Edin Čulov.

UNIS Ginex bilježi uspješni plasman proizvoda na tržište mnogih zemalja, na gotove sve kontinente. Osim što je povećala prihode u 2022. godini, ova kompanija povećala je i broj zaposlenih za oko 100 radnika.

Premijer BPK Edin Čulov kazao je na manifestaciji da Vlada BPK već treći put podržava ovu dodjelu priznanja, te izrazio zahvalnost Udruženju poslodavaca BPK u nastojanju da donesu pozitivne promjene u BPK.

"Vidite da je večeras lijepa atmosfera, ugodno je druženje. Došli su svi najznačajniji privredni subjekti, skupštinski zastupnici, predstavnici Vlade kantona. Ovakvi nama događaji trebaju", kazao je Čulov i pozvao sve privredne subjekte sa područja BPK da se maksimalno podrže uposlenici kako bi se bolje motivisali i radili.



U kategoriji srednjih preduzeća priznanje je dobila firma "AC Unity" d.o.o. Ova firma je formirana 2015. godine, a osnovna djelatnost je proizvodnja vojnog oružja. Priznanje je uručio Zijad Briga, ministar privrede BPK.

Predstavnici firme "AC Unity" zahvalili su se prisutnima i kazali da im puno znači što prate rad svih privrednika.

U kategoriji malih preduzeća priznanje je dobila firma Okac d.o.o Goražde, a priznanje je uručio predsjedavajući Gradskog vijeća Grada Goražda Bajro Obuća. Osnovna djelatnost ove firme je građevinarstvo, te se bavi izgradnjom, sanacijom, rekonstrukcijom i održavanjem puteva, zatim izgradnjom stambenih i poslovnih objekata.



"EBI security" dobila je priznanje za najveću ostvarenu dobit u kategoriji mikro preduzeća. Ova firma osnovana je 2013. godine i osnovna djelatnost je usluga zaštite u sklopu sigurnosnih sistema. Priznanje je uručila predsjednica Udruženja poslodavaca BPK Šejla Bojadžija.

Ona je kazala da je cilj ovog događaja da oda priznanje i zahvalnost preduzećima, zajedničko druženje i razmjena ideja i iskustava. Kazala je da bi i ova godina trebala da bude uspješna.



"U saradnji sa Vladom BPK i Gradom Goraždem normalno da ćemo praviti nešto što bi trebalo da bude prepoznatljivo i da postane tradicija", dodala je Bojadžija i najavila nastavak održavanja manifestacije.

Na kraju 2022. godine u BPK Goražde bilo 195 privrednih subjekata, od čega mikro 135, malih preduzeća 50, srednjih 6 i 4 velika preduzeća. Ukupno su ostvareni prihodi u iznosu od skoro 445 miliona KM, što je za 11,43 % više u odnosu na 2021. godinu. Ukupna ostvarena dobit u 2022. iznosila je skoro 34 miliona KM, što je za 5,7 % manje u odnosu na godinu ranije.

Ukupan broj radnika na kraju 2022. godine od ukupnog broja privrednih subjekata iznosio je 4.554 radnika što je više za 50 radnika u odnosu na 2022. godinu.



